

وزارة الثقافة



الهيئة العامة لقصور الثقافة

حكايات تهميشية

محسن الخياط

2010

حكايات بهيئة

محسن الخياط

أحد مطبوعات مؤتمر أدباء مصر
الدورة الخامسة والعشرون
ديسمبر 2010



الهيئة العامة لقصور الثقافة

رئيس مجلس الإدارة
د. أحمد مجاهد
أمين عام النشر
سعد عبد الرحمن
مدير إدارة النشر
على عفيفي
الإشراف الفني
د. خالد سرور
الإعداد والتنفيذ
سوزان عبد العال

• حكايات بهيئة

• محسن الخياط

• الطبعة الأولى،

الهيئة العامة لقصور الثقافة

القاهرة - 2010م

• تصميم الغلاف:

فكرى يونس

• المراجعة اللغوية: ممدوح المتولي

محمد عامر فاضل

• رقم الإيداع: ٢٢٧٨٨ / ٢٠١٠

• الترخيم الدولي: ٩٧٨-٩٧٧-٧٠٤-٣٩٩-١

• المراسلات:

باسم / مدير إدارة النشر

على العنوان التالي: ١٦ شارع

أمين سامي - القصر العيني

القاهرة - رقم بريد ١١٥٦١

ت: 27947897

البريد الإلكتروني:

elnashr@yahoo.com

التجهيزات والطباعة:

شركة الأمل للطباعة والنشر

ت: 23904096

• حقوق النشر والطباعة محفوظة للهيئة العامة لقصور الثقافة.

• يحظر إعادة النشر أو النسخ أو الاقتباس بأية صورة إلا بإذن

كتابي من الهيئة العامة لقصور الثقافة، أو بالإشارة إلى المصدر.

حكايات بهيئة

حكاية الحكايات

كنا فى بيروت ، وكانت وقتها الجبهة الوطنية متماسكة إلى حد كبير ، تساند الفلسطينين ، وتبث الآمال فى قيام دولة لبنانية علمانية تنفض عن كاهلها عبء الطائفية بكل ما جرته من حروب ومن تدخل . وشارك المثقفون المصريون المتواجدون على الساحة فى دعم نضال الجبهة ، ساعين إلى أن يكون لمصر صوت فى المعركة . وعندما دعينا للمشاركة فى إذاعة صوت لبنان العربى بصوت مصرى ، فكرنا أنا والفنان عدلى فخرى وآخرون ، فى أن نقدم بعض بطولات الشعب المصرى ، بأسلوب فنى يجتذب إليه لا شعب مصر وحده بل الشعب العربى كله ، فاخترنا (حكايات بهية) مدخلاً يحكى من خلال الراوى والأغنية بعض بطولات شعبنا العظيم .

وكم كنا سعداء ، حينما اتسع نطاق تداول الحكايات من لبنان إلى عدد من البلاد العربية ، وبعودتنا إلى مصر كنا تواقين إلى أن تجد الحكايات طريقها إلى الشعب ؛ فاستعنا بالتجمع الوطنى التقدّمى

الوحدوى، الذى اكتفى بملء بعض الأشرطة لبعض مقاره . وشاءت الظروف أن ندعى لتقديم حلقة سيد درويش، بمناسبة ذكراه بالمسرح المتجول . وقد لاقت حماساً فائقاً من جمهور الحاضرين . وفى المركز الثقافى لرعاية شباب العمال دعينا لتقديم بعض حلقات « بهية » لشباب العمال .. وقدمنا حلقات « عبد الله النديم » و « عرابى » و « سيد درويش »، وتفاعل جمهور الحاضرين مع غناء عدلى فخري وأخذ بسرعة مدهشة يردد معه الأغنيات .

وظلت حكايات « بهية » فى مصر حبيسة الإطار الضيق الذى قدمت به الفكرة . وعرضت على بعض دور النشر الوطنية تولى مسئولية طبعها ، ولكننى ترددت . حتى التقيت طاهر عبد الحكيم، صاحب دار الفكر للدراسات والنشر والتوزيع، ووجدت فى داره متنفساً لحكايات بهية ، التى تتسق مع ما تقدمه الدار من فكر، إلى جانب أن صاحبها أحد الذين عاصروا ولادة بهية فى بيروت، وأحبوها وتحمسوا لها .. فوضعت الحكايات بين يديه، وكلى ثقة بأننى وضعتها فى أيد أمينة .. قادرة على تقديمها لشعبنا العزيز ..

وحتى لحظة صدور الجزء الأول من الحكايات عن دار الفكر، فإننى ما زال يراودنى الحلم بأن تتحول فى القريب العاجل إلى شريط كاسيت يتداوله شباب مصر كوثيقة فنية تركزى فيهم روح الوطنية الصادقة وتؤكد لهم بطولات الشعب المصرى ومقاومته الطغاة والغزاة والمستبدين، هذه المقاومة التى لم تتوقف منذ فجر التاريخ . وما "حكايات بهية" سوى جزء يسير من تلك البطولات .

محسن الخطاط

تمهید

أنا عارف
بأنّ اللى انكتب فيكى
يا دوب عنوان بطولاتك
يا دوب صفحه ف حكاياتك
ملايين السنين وانتى على الدفه
ومجدافك ضمير الناس
تفوت المركبه فى النيل
تعبى كل موجه حماس
وترميها على الشطين
ياخذها العطشانين للنور
ملايين السنين وانتى
تمدى إديكى للدنيا

ويوم ما ننجرح تبقى الدوا للجرح
ويوم الفرّح تبقى انتى رايات الفرّح
لا يوم هزك نباح حاكم
ولا همك عصا سلطان
ويوم الشده تبقى قلعة المظلوم
وجورة نار على الظالم
أنا يا أمى .. مش ناسى بطولاتك
وكل اللى رفع سيف المقاومه ف يوم
أخذ عنك
أخذ عن فلاّحينك كلمة الثوره
على اللى يمسّ يوم توبك
سوا كان العدو من جوه أو بره
ملايين السنين وانتى
فى صوتك ، صوت فصيح القوم
"بتضربنا"
"وتاخذ كل شىء منا"
"وتحرّمننا من الشكوى؟!"
ما هنتى ف يوم ولا هنا
وقلنا للفراعنه لأ
وللاغريق ،
وللرومان ،

وناصرنا المسيح وقت اضطهاد الدين
ويوم رفع الصليب الغرب
وخاض باسم الصليب الحرب
كبر فينا صلاح الدين
ويوم ما زمرة الممالك
بقت خطوتها فينا خراب
صبحنا حراب
عرفنا إمتى حنقول آه
وإمتى فى الوحوش الضلّمة راح نرفع سيوف الحق
تاريخك سلسله ملضومه بالعصيان
وبالثورات
ومنها صفت انا الحكايات
وانا عارف
بإن اللى انكتب فيكى
يا دوب عنوان بطولاتك
يا دوب صفحه ف حكاياتك

مفتاح

على الطريق مشينا
والليل غريق مشينا
وعلى الجراح مشينا
وتهدنا ياما تهدنا
وعدنا .. والتقىنا
يا مصر .. يا بهيه
القهر .. نهر فينا
والليل يطول علينا
نقصّر الليالى
بغنوه أو حكاية
وف لحظة النهايه
ببتدى الحكايه

حكايتك يا بهيه
للأيام اللي رايعه
والأيام اللي جايه
يا مصر.. يا بهيه

محمد کریم

الراوى: ولا كل من لبس العبايه يزينها .. ولا كل من ركب الحصان
خيال .. وساعات يكون تحت العبايه عنتر .. وساعات
يكون من تحتها دجال .. حب الوطن مش قواله .. حب
الوطن أفعال .. احديلنا يا حادى من دفترك موال .. كم من
رجال ماتت .. لكنها عايشه فى ضى أفعالها .. وكام رجال
عايشه بينا كما الأموات .

الشيخ محمد كريم .. كان حاكم اسكندريه .. وكان راعيها
وحاميها .. كان الفنار اللى قايد .. وكان علمها اللى
بيرفرف على طوابيها .. جاله خبر إن أسطول الإنجليز راسى
ف موانئها .. طلب النزول ع الشواطى .. وقاله يا شيخ
كريم .. مالناش هنا من مقاصد .. غير إننا نحمى مصر ..
من جيش فرنسا اللى آتى .. صوت مصر فى قلب شيخنا

رفض .. وقال دا مطلب محال .. مصر العزيزه لها ناسها
اللى تحميها .. من أى عدوان يأتى .. طلبوا مئونه وميّه ..
وقالوا ندفع تمنها .. دهب إذا الشيخ أراد .. ورفضتى يا
اسكندريه .. رفضت يا شيخ كريم .. رفضت إنك تسلم ..
رفضت تدى للغريب الزاد .. وقلت خير البلاد، للبلاد .. لا
عمره يطعم غريب ولا للغريب ينباع .

الغنى: وكبيره .. كبيره .. كبيره يا مصر

كبيره يا مصر بناسك
وأميره .. أميره .. أميره يا مصر
وقلوب الناس حراسك
وخطيره .. خطيره .. خطيره يا مصر
لو حد حبس أنفاسك
وكبيره .. كبيره .. كبيره يا مصر
أنفاسك نار
مع كل نهار
تولدنا كبار
وكبيره .. كبيره .. كبيره يا مصر
ترمى الأيام
فى قلوبنا سهام
عينك ما تنام
وتطق شرار

وكبيره .. كبيره .. كبيره يا مصر

لو شمسي تغيب

لو قمرى يشيب

ما تحبى غريب

يحمى لنا الدار

وكبيره .. كبيره .. كبيره يا مصر

الراوى: الانجليز شدوا الرحال من هنا .. أسطول فرنسا وصل زلزل

بناره المدينه .. وشفتى يا اسكندريه .. فى العمر أيام

حزينه .. "بونابرت" قابل كريم .. قرا ف عينيه العناد ..

وكان عناده صواب مشدوده فوق الزناد، حسب حساب

اللى جى .. طول ما الزعيم اللى واقف قصاده راح يبقى حى

.. يبقى السلام فى المدينه .. ريشه ف مهب الرياح .. على

إيه يا شيخ ناوى؟ .. الشيخ محمد كريم فتح بيبان

المقاومه .. فى السرّ ضد الغزاه .. وقال حلال يا مصر قتل

الفرنساوى .

المغنى: اكبر .. اكبر

اكبر .. اكبر

صوتك فوق الظلم بيعلا

صوتك صوت الحق بينكبر

خطى الصعبه .. تلاقى السهله

سوّى الجسر تلاقى المعبر

إِكْبَر .. إِكْبَر
خطي الضلمه .. خطي الوحله
تلقى الشمس عليك بتدور
كل ما تولع نار تحلا
تكبر إنت .. عدوك يصغر
إِكْبَر .. إِكْبَر

الراوي: جيش فرنساوى ما لقاش ولا حيله .. فى اللى جرى فى
المدينه .. أخذوا كريم رهينه .. وطالبوا بالديه .. رفض
الزعيم يسمع .. ورفض على ناسه لو فكّرت تدفع .. زرعوا
الحراب فى الزعيم .. ومات كريم شهيد المعركة والحق ..
لكنه عاش ما بين قلوب الناس .. مات الزعيم العظيم ..
وصوته من فوق الحراب رافض .. لا لان ولا سلم .. ولا رمى
سلاحه .. قصاد فرنسا العتيه ، أيام ما كانت جيوشها كما
الجراد زاحف .. ع الخضره شرق وغرب .. ما خافش نار
الحرب .. ما قالش كيف أعزل .. يقف قصاد المدافع .. كل
اللى كان فى ضميره إنه يصونك يا مصر من سطوة
الأجنبى .. إن شاء الله حتى نموت .. والكل واقف يدافع عن
مصر .. بالنبوت .

سليمان الحلبي

الراوي: الأصل مش مصري لكن كنيته عربى .. وفى رواق الأزهر ..
كان الوطن واحد .. ما كنت تعرف مجاور مصرى من
يمنى .. الدم كان عربى .. والعلم كان عربى .. والدين كتاب
الجهاد .. ولا عمر يوم الأزهر سمى البلاد بالإسم .. الكل
كانوا فى الرواق اخوات .

الشاب إسمه سليمان .. لكنه كان معروف فى وسط رفاقه
بالحلبى .. عرف الإيمان الحق جواً الرواق .. عرفه بحق
وحقيق .. وشافه ثوره وطريق .. كبر وغنى لبهيه ..

المغنى: يا ام العيون السُّحْر .. سحرك نادانى

عاشق رمتنى عيونك العربيه

سَلَّمْتَهَا أَمْرِي

الشُّعْر خيلى والكلام حنيّه

ساعة ما صوت الهمس يندهلى
أحس إننى وسط ناسى وأهلى
الوش نيلى.. والقود حليه
وإيه يكون عمرى

لو كانش يفدى عيونك العربيه

الراوى: كنتى ف حصار يا مصر.. جيش الفرنساوى قصادك

بحر وزمرة الممالك فى ضهر كخنجر.. بونابرت، يوم
ساب البلد متخفى.. خلف كليبر وراه.. فى بحر
عاصف، ما سابش لحد قارب نجاه.. أسطول فرنسا فى
خليج أبو قير.. أصبح حطام السنين.. يوم ما الغيلان
قامت على بعضها.. والمعركه فى أصلها.. مين اللى
يسبق ويخطف بهيه من أهلها؟

يا شيخ يا شرقاوى.. يا مشيخة الازهر.. الثوره من فوق
المدن بتكبر.. الأوله ثوره.. والتانيه ثوره.. والتالته
خنجر فى إيد سليمان..

المغنى: جيت الرواق مشتاق

جيت الرواق مشتاق

فى الشام لقيتنى ف مصر

وف مصر شفت الشام

والسهم لو صابك.. يصيبنا كلنا بسهام

جيت الرواق مشتاق

لقيت غريب الخطاوى
بتدب فوق أرضك
وحراب فرنساوى
مشدوده فوق قلبك
قلبي فى جنبى انكسر
وشفت فى الخنجر
السم.. والترىاق

الراوى: الحلبي ماشى فى الرواق تايه.. الحلبي من بين الرفاق
اختفى.. فين تهت يا حلبي؟.. انشقت الميادين بلعت
خطاوى الشاب؟.. الشاب ضاق به الرواق؟ الشاب قام
سافر؟! والآن الحكايه إيه؟؟!

قالوا كليبر كان بيتمشى فى جنينة القصر.. لمح قصاده
صبى.. بيشحت اللقمه من الأجنى..

العبي: لله.. يا ناهين خير العباد.. لله..

- وقام كليبر مد إيداه بقرش.

العبي: لله.. يا ناهين خير العباد.. لله..

- لمح السلاح الابيض فى شمس الأصيل.. نزل انغرز فى
القلب. قالوا كليبر مات.. قالوا كليبر موته شحات.. قال
الرفاق عربى.. الإسم شحات واسمه فى الرواق حلبي..
فى خنجر ك يا حلبي قوة جيش.. وقابلت لحظة موت لم
شافها يوم مخلوق.. قالوا يموت ع الخازوق.. ما طرف

لعينك رمش.. ولمعت من بين الغمام كالبروق.. والكل
قالوا سليمان.. ضحى بحياته عشان مصر العروبه تعيش.
الحمله شالت عزالها بعدها بأيام.. وعشان بهيه.. بيحلو
ف عينينا الموت.. وتكسر على صدور الرجال السهام.

عمر مكرم

الراوي: كانت الفوضى فرس جامع بيرمح فى المدينه ..
والسكينه .. فى قلوب الخلق تصطادها الرياح .. نهب ..
سرقه .. قتل .. والأجساد ليلاتى تتصلب على باب
زويله .. فوق حيطان القلعه فوق سارية علم .. والشوارع كل
يوم تغسل ترابها بنهر دم ..
الظلام مرفوع على راس المدينه سيف .. والحراب متصوبه
على كل قلب .. كانت المحروسه تعرق .. تشقى .. وتسف
التراب .. والعرق من غير حساب .. يجرى فضه فى قصور
المملوكيه وانكشاريه وعساكر أرناؤود ..
كان إبراهيم ومراد من المماليك .. وكل واحد له جنود
واتباع .. وقصور وأرض ومتاع .. ووالى تركى بيلم
للسلطان رغيف الجياع .. لكن فى وسط المظالم .. وف قلب

ليل الضياع .. من صلب مصر اتولد شيخنا عمر مكرم ..
أخذ في حضنه الرعيه .. ورفع رايات الشعب .. ومشى
الطريق الصعب .

النهب راكب فوق حصان رهوان .. النهب رافع سيف ..
القتل للمنهوب والسطوه للحاكم وللجلاد .. ويوم ما هاجم
جيش فرنسا البلاد .. فر ابراهيم ومراد .. وسابوا شعبك يا
مصر .. بلا سلاح يحميه .. وقمت يا شعب مصر .. على
هدير الطبول والزمور .. بالعُصَى والنبابيت .. والبندق
النبوي في إدين عمر مكرم .

المغنى: يا ثورة الفقرا .. يا صرخة المساكين
قومي قوليلهم إحنا نبقي مين؟

إحنا ف ساعات الجد
ننسى الشقا والبرد
ننسى النهار الصهد
ننسى اننا .. من غير عشا بايتين
يا ثورة الفقرا ..

إحنا العرق في الغيط
إحنا صحاب البيت
لو حتى بالنبابيت

نحمى الوطن .. لو حتى مش لاقين
يا ثورة الفقرا ..

الراوى: ثلاث سنين فاتوا .. ومصر رافعه راية العصيان .. وكان عمر
مكرم وسط الجموع الشموع .. بإديه بيبنى الحصون ..
ويقيم معامل للرصاص والبارود .. وبيزرع المتاريس .. شاف
الفرنسيس كيف يكون الشعب ساعة المقاومه .. ما يلقه
حبل الخداع .. ولا يرضى لحظة مساومه .
خرجت فرنسا من حصارها ف مصر .. بعد اتفاق بينها
وبين الانجليز .. والوالى فى اسطنبول .. الحكم يفضل تحت
تاج عثمانلى .. وفرنسا وانجلترا تفتح طريقها لمصر ..
بعصاية السلطان .. ويصدر فرمان .. والى وراه والى ..
لحين ما يمسك خورشيد الصولجان .. وتطلّ من بين الشقوق
السيوف .. وسواقط الممالك .. والأرنب المذعور يرجع فى
إيده سيف وراكب حصان .. وتعود لمصر الليالى الضجر ..
والرعب يرمى ظلاله ع البيوت والشجر ..

الراوى: وتصيرى يا مصر ساحة ملاكمه .. وكان محمد على قاعد
بيتفرّج .. جه ويأ جيش الترك واتسمّر ف أرض النيل ..
شاف العراق واخذ مداه .. وهوا واقف وراه .. بيطاطى راسه
للزعيم والشعب .. واتعاهد إنه لو وصل للعرش .. حيفصّ
كل المظالم .. ويسوس أمور الرعيه بالعدل والإنصاف ..
ومشورة الزعما وأولهم عمر مكرم .. واتعاهد إنه يخلص

مصر م البرديسى وشروره.. ويوقف السلب اللى خلا
الناس نست شكل الفلوس.. لاجلن ما يرفع عن كتافها
الكابوس..

المغنى: إيه راح تاخذ من تفليسى

إيه راح تاخذ يا برديسى

من تفليسى

عرقى.. مرقى أخذته ف جيبك

ولجواسيسك.. ولحاسيبك

لم خليت ولا خُرده فى كيسى

يا برديسى

عمر ما كان لك دين ولا مله

خدت الغنمه وخدت الغله

حتى ما هانش تفوتلى سريسى

يا برديسى

عمر ما كانت مصر تهملك

ولا كان دم المصرى ف دمك

همك تسرق نور فوانيسى

يا برديسى

الراوي: قاموا المشايخ على رأسهم عمر مكرم .. واتحاطوا بالقلعه .. والشعب كله من وراهم جيش .. وطوروا البساط ونزل علم خورشيد .. وطلع محمد على ع العرش باسم الشعب .. وبدال ما يبقى الحد ما بين الظلام والنور .. الباشا فك العهد وهدّ مشورة الزعما .. وأخذ بإيده الحكم والكلمه .. ومصر وقفت ضحيّه .. وبقت وسيّه لأسرة القولى .. ورفض عمر مكرم دعاوى الوالى للقلعه .. إلا إذا صان الوعود والعهد.

وقامت الناس بالنبابيت والخناجر .. والهتاف شق الخناجر .. والباشا رغم الهيبة والسلطان .. كان قلبه يرعش من دبيب النمل .. دبر كتيبه وكوكبة فرسان .. وفى يدها فرمان .. ينفى عمر مكرم على دمياط .. وهبّت الخاليق .. سدوا عليها الطريق .. والقتل شق السكك يحصد رقاب الخلق .. سقط القناع وبانت سحنة الباشا الحقيقى .. بدون زيف أو خداع.

الراوي: ومات عمر مكرم كما يموت الفقير .. وعاش لنا صوته .. يقول ما يكبر كبير ولا يعلى يوم ع الشعب .. ولا حد يقدر يطير .. من غير ما روح الشعب .. تنبّت الجناحين.

حملة فريزر

الراوى: لما التاريخ يقول .. تهدا النفوس وتكبر .. وتدوس
الكذب الاصفر .. وتزيح عنها الكابوس .. ونفوسنا لما
تكبر .. وتصحى ع الحقيقه .. ما حد يشتريها .. ولو بمال
قارون .. نكون أو لا نكون .. طول عمرها القضية ..
قولتيها يا بهيه .. بدال المره ميّه .. قولتيها يا بهيه .. فى كل
غزوه جايه .. فى غزوه سكسونيه .. وغزوه صهيونيه ..
الوالى خالى البال .. اتغدى بالممالك فى ساحة القلعه ..
واتعشى بالزعما .. ونفى عمر مكرم على دمياط .. وقال
الراوى ما قاله من الحكايات ..

المغنى: تبدى له النقيب مكرم

وقاله يا فتى أعلم

بأن المصرى حيحطم

قيوده اللي اتربط بيها

مزارع جوها دافى
وطولها وعرضها وافى
وليه يمشى ابنها حافى
يمد الإيد ويطويها
وليه القاضى والوالى
يجيبهم بابنا العالى
وليه ما يكونش طوالى
حاکمها من أهاليها (١)

الراوى: الوالى كان من زمرة الأتراك .. موآله مش عربى .. ولا عمره
خط الكلمه بالعربى .. الوالى كان خيال زمانه .. جاله الخبر
من رشيد موآله خائنه .. وصولجان الولايه بين إيديه اتهمز ..
الانجليز ع الشط .. حملة فريزر جايه قاصده مصر .. والرعب
كالخفافيش فى سقف القصر .. قال يا خبر يا شوم .. رض
النجوم فلكى .. قاله خطاوى هموم لازم تخطيها .. كان الخبر
حفره وقع الولاه فيها .. يقدر على الممالك .. يقدر على
الزعماء .. يقدر على الشعب بالكرباج وحد السيف .. لكن
يحارب الانجليز إزاي ؟ .. وتضيع بهيه الوسيله ؟ .. وقال ما فيش
قصادى غير طريق واحد .. نقعد ونتفاهم !! ..

المعنى: وادلى يا رشيدى

على وش الميّه
هات إيدك تاخذ بايدي
دى الموجه قويه
واهى خطوه يا رشيدى
ونعدى الميه ..

الرعب عاش فى القصر
لكن فى قلب الرشايده كانت مصر
لكن فى قلب الرشايده عاشت مصر

الراوى: قامت رشيد كلها .. ما حد يوم دلها على الطريق .. تحضن
تراب أرضها .. وتشد إيد الغريق .. والوالى فى القصر
والنرجيلة قدامه .. بيساوى قطنيته ويشد ف حزامه .. جاله
الخبر من بعيد .. إن الولاد والصبايا .. إن اليتامى الولايا ..
على طول حوارى رشيد هما اللى طفوا الحريق ..
واهى السنين يا مصر .. بتسابق السنين .. كام من وُلاه
زلّوا .. كام من ولاه ضلّوا .. كام من ولاه ولّوا .. كام من وُلاه
ماتوا فى ضمير الشعب .. كام من ولاه التاريخ داسهم بلا
رحمه .. وعاش أهالى رشيد .. وعشت يا شعب مصر ..
وعشت يا شعب مصر .

(١) هذه الأبيات استعارها المؤلف من بيرم التونسي من ملحمة الأسرة العلوية ، التى
أرغم على كتابتها فى الأربعينيات ، لكنه كتبها بذكاء الفنان ابن الشعب .

عبد الرحمن الجبرتي

الراوي: كثير من بيمسك دوايه وقلم .. كثير من بيكتب حكايات
الشعوب والأمم .. لكن قليل اللي عاش الحياه الصدق ..
وقليل قليل اللي شاف .. وعاش يكتب تاريخ عصره في
نفس العصر .. بدون ما يخشى سيف باطش .. بدون ما
يزوق الحكايات عشان ترضى كبير القوم .. ويتعلق في
صدره وسام .. وكثير كثير الكلام .. لكن قليله اللي بيعمر
مع الأيام .. لحظة يقول التاريخ .. من غير ما يبقى خيوط
ومسرح دمي .. ياما قلام اترمت على صدر مولاها ..
واتحطمت على صخرة الكلمه .. التاريخ .. النور .

مين اللي حقه النهارده يقوم ويتكلم ؟ .. ويحكي سيرة
بهيه ؟ مش انت يا شيخ جبرتي .. مين اللي يقدر يشق

بسيفه قلب الظلام .. ويعيد شباب الحقيقه .. ويخلى
شمس الكلام .. تطلع تدفى القلوب؟ مش انت يا شيخ
جبرتي .. ما هي نفسها الأيام .. بتعود وترمي ظلها لقدام ..
وهو نفس الأغا .. والباشا .. والمملوك .. وهما هما
المملوك .. ويا دوب قدرنا نفك عقدة عجزنا بالغنا .. وبكلمه
منغومه .. عماله تتحسس طريقها ف أرض ملغومه ..
ونقول .. وهو برضه الكلام والقول .. بياخذ قطره من
بحرك .. عشان يشفى غليل الناس ..

المغنى: الله .. يا ليل .. الله

قالوا الكلام ما احلاه

قلت الكلام أحلاه

إلى لا مال .. ولا تاه

قول يا جبرتي قول

يا لى نسجت القول

زى الحرير ع النول

وكان نسيجه حياه

الله .. يا ليل .. الله

ما خفت م التخويف

وبعيد عن التحريف

وصنعة التزييف

أخذ التاريخ مجراه

الله.. يا ليل.. الله

الراوي: حققت ما يعجز قصاده ألوف.. وكتبت صفحه من تاريخ
شعبك.. بلا وجل أو خوف.. فيها العجيب والغريب م
الترجمات والسَّير.. فيها عرفنا كيف وطننا عاش.. كيف
شعبنا كابد.. كيف مات من الطاعون وسطوة الأوباش..
لكنه كان صامد.. فيها عرفنا كيف وقفنا ف يوم.. نردع
الأجنبي.. صنف الفرنساوى.. ونصد زحف المعتدين..
بالشوم وبالسكاكين.. كيف كنا كالطوفان.. إذا إنسان
رمانا بجرح..

المغنى: عودتني ألقاك تطوى الهموم الليل
عودتني أسمعك فى الغنوه.. والمواويل
هادى كما النسمات،
رايق كموج النيل
لكنك انت يا شعبى يوم يفيض الكيل
الثوره تصحى ف عينيك
ولا حد يقدر عليك .

تقف فى قلب العواصف.. كما شموخ النخيل
الراوي: كان الجبرتى لسان الصدق فى عصره... خلَّى التاريخ
الأبكم.. يقول ولا يرحم.. يقول ما يعصى القول.. عرئى
محمد على م الجبه والقفطان.. ووقفه عريان قصاد الخلق..
يوم شد حد السيف.. وحكّمه فى الرقاب.. يوم جمع

المحاصيل ويَتَمُّ فلاحين الأرض .. يوم خد بإيده ما أراد
بالفرض .. ونفى عمر مكرم على دمياط .. لكنه ما قدرش
على صوت الجبرتي الحرب .. كان الجبرتي شهرته سابقاه
في وسط العُلَمَّا شرق وغرب .. كيف ينتقم منك ؟ .. كيف
يجبرك تنسى الورق والقلم ؟ ..

شاف حبك الطاغى لولدك خليل .. رمى عليه حفنه من
الصعاليك .. هاجموه في عز الليل .. وحملوه م الجراح ..
كل اللي كان في شرع سيدهم مُباح .. وشالوه إليك فوق
الإدين مصلوب .. فاضت دموعك زى موج النيل .. فاضت
دموع كالدما .. صابت عينيك بالعمما .. وطويت
كراريسك .. لا كتابه .. لا قرايه .. وهجرت سن القلم
والدوايه ..

وراح محمد على .. وطوى التاريخ صفحات .. وعاش تاريخ
الجبرتي .. عاش الكلام الشموس يطوف بالبلاد .. بأروع
الكلمات .. اللي انت سطرته على ضفاف النيل .

دفاعۃ الطهطاوی

الراوي: شعوب بلا معرفه كما قلب من غير نبض .. كما أرض من
غير ميه من غير شمس .. كما السحاب لو كان شحيح
المطر .. والمعرفه لو شقت السكه .. تاخذ بإيد الغريق
وتفوته م الخطر .. المعرفه كتابه .. المعرفه قرايه .. وفكر
بيسطره سن القلم والدوايه .. والمعرفه مرايه .. فيها تشوف
الشعوب نفسها .. فيها تشوف الشعوب بعضها .. والمعرفه
حكايه .. بتقول تاريخ البشر .. وتقول دا ليه انهزم ..
وتقول دا ليه انتصر .. وتقول دا ليه انظلم .. وليه دا قام
بالسلاح .. نهب وهد .. وظلم .. والمعرفه بوصله بتهدى
السفينه .. وبيها نقدر نميز صوت الرياح الأمينه .. من
الرياح الحزينه .

بالأمس .. كان العلم للأمرأ .. ما يعرفه الفقرا ولا يشوفو له
طريق .. والحاكم الأخرس .. يقدر يسوس بلده بالسيف
وبالكرباج .. أسرة محمد على عرفت بأن المعرفه
كالسيف .. وسيل بيحرف كل ظلم وزيف .. عاشت تخاف
المدرسه والعلم .. من كتر ما عانت .. من مشيخة الأزهر ..
من سطوة العلما .. ومن عمر مكرم .. ومن الجبرتي الحق ..
وزى ما عاشت حوارى مصر فى الضلمه بلا فوانيس ..
عاشت بلا عريف .. بلا كتاتيب .. بلا كراريس .

لكن محمد على .. عشان ما يفضل ما بينه وبين فرنسا
جسور .. بالغصب وافق على بعثه تروح لباريس .. واختار
لها رفاعه .. صعيدى من طهطا .. خد علمه م الأزهر .. وخد
النظام م الجيش .. وقالوا يصبح رفاعه ، الإمام .. يحفظ
أوامر الباشا ، ويصون النظام .. وهناك فى دنيا باريس ..
صبح الإمام تلميذ .. يكتب ، يالف ، يترجم كل ما شافه حا
يخدم مصر .. وينور الفوانيس .. رجع الإمام وف ذهنه شىء
واحد .. إزاي حينقل مصر من درب الظلام والجهل ..
ويخطى بيها للدرب المعرفه والنور .. وف مدرسة اللسن ..
جمع بإيده الولاد .. من طول وعرض البلاد .. عشان بنور
العلم يهدوا الجموع .

وراح محمد على .. وجه وراه عباس .. قالوله إنّ الإمام ..
صحّي بكلامه العوام .. على حقوقها اللي ضايعة .. قام
الخديوى الهمام .. قفل جميع المدارس بالضبه والترباس ..
ونفى الإمام ع السودان .. قال العلم ممنوع .. ولا ترفعوش
راسكو فى حضرة الأُمرا .. الجهل للفقرا .. والسبخره
للفقرا .

المغنى: قوموا ارفعوا راسكم فى حضرة الأُمرا

العلم للفقرا ..
والحلم للفقرا ..
الباشا قال ما .. فيش عيال
تكتب ولا تقرا
قوموا اكتبوا واقرؤا
وابنوا أمل بكره
العلم للفقرا .. والحلم للفقرا

فى شرع مين .. الفلاحين
تشقى ولا تدرى
ولا عندهاش فكره
بكل .. ما يجرى
العلم للفقرا .. والحلم للفقرا

قالوا الكلام .. مش للعوام
والكلمه للأمرأ
قلنا العلم للفعله .. والأجره
العلم للفقرا .. والحلم للفقرا
قوموا ارفعوا راسكم فى حضرة الأمرأ

الراوى: وتعيش يا طهطاوى .. خوجه لولاد مساكين .. فى حاره فى
الخرطوم .. ويقوم سعيد ع العرش .. يرد باب اللى داخل ..
بالنور .. على كل جاهل .. إزاي حيطعم ولاد الفلاخين
العلم .. وازاي يسوقهم تانى بالكرباج إذا ما احتاج ؟ ..
وعشتى يا مصر تحت مذلة السخره .. وحفر ولادك قناه
بالموت بلا أجره ..

وبعده جه سماعين .. وعشان ما تبقى مصر زى باريس بلاد
النور .. باع مصر والفدادين .. باع مصر بالقرشين اللى بنى
بهم قصور .. وفات لمصر القبور .. وحقد عمال بيحفر
طريقه جوا الصدور .. وجه رفاعه م السودان على مصر ..
وشاف وريث القصر عايز م العلم صوره .. تشهد بإنك يا
مصر .. بقيتى حته من باريس العصر .. وقام رفاعه يبنى فى
الكتاتيب .. يبنى مدارس بعيده عن إدين القصر والأمرأ ..
قامت بإيد الأهالى وملك للفقرا .. وعاش يطوف بالبلاد ..
يختار بنفسه اللى يسقى العلم للأولاد .. وزرع بإيده شرارة
العلم والثوره ..

المغنى: فضُّوها حكاية وسيره
مش عايز مصر أسيره
أنا عايز مصر الحره
مش عايز مصر الغربه
مش عايز مصر أوروبا
ولا جايه التوب من بره
أنا عايز مصر صبيه
وعايزها زى ما هيّه
آخذ إيدها فى إديّه
نبني حياتنا بحريه

الراوى: ويوم ما جه بكره.. كان بين إيدين الولاد من الكتب
ميّات.. بتقولهم بالحرف.. إزاي يقوموا ويخرجوا للنور..
إزاي ينظم حقهم دستور.. كيف يحكم الشعب كيف
يكشف دعاوى الزور.. فينك يا طهطاوى.. وانت بترفع
مصر بالكلمة.. وانت بتدّى مصر دم القلب.. وانت
بتديها الوفا والحب.. فينك تشوفنا وف إيدينا الأمانه..
قاصدين نوصلها لإيدين الشعب.

جمال الدين الأفغانى

الراوي: الثورة مالهاش وطن .. يوم ان يزلزل خطوها الزلزال .. يوم
ان يفجر دمه البركان .. بتشد ليها أخلص الفرسان .. لا
تعترف بمعاد .. ولا بتاريخ أو زمان .. وكثير كثير ثوار .. لم
عرفوا للثورة وطن أو دار .. ولا يوم بنوا لها شاهق
الأسوار .. ساعة ما شافوا الحياه الدمار .. بتهدد الإنسان في
كل مكان .. قالوا وطننا يكون .. حيث يقدر الإنسان يحمل
سلاح .. حيث يقدر الإنسان .. يعلا على صوت الجراح ..
جيفارا شاف في كل ثوره وطن .. جيفارا مات في بوليفيا ..
ودفع في وسط الغابات والجبال التمن .. وصوته عاش شاهد
على عصره .. إن العدو واحد .. في كوبا .. في شيلي .. في
أنجولا .. وفي الفيتنام .. قال عصرنا .. عصر الصراع ضد
الغيلان .

وزى ما كان جيفارا .. صرخه وطلقة رصاص .. صوتك يا
أفغانى .. كان الرياح اللى شالت للشرق صوت الخلاص ..
وزى ما كان جيفارا .. رافع رايات الثورة ضد الأمريكان ..
رفعت يا أفغانى راية الثورة ضد الإنجليز .. فى الهند .. فى
السودان .. فى إيران .. وفى الأفغان .. وف مصر حطيت
رحالك .. ولقيت صدى صوتك فى ثورة عرابى .. ولقيت
فى مصر السلاح والرجال .. ترمى الكلام النبال .. يتهزّ
عرش الانجليز والقصر .

المغنى: الفارس الطواف

فات من هنا وعدى

لمح قلوب قايدة

واقفه بتتحدى

وتقول عمار يا مصر

الفارس الطواف

يرمى الكلام ما يخاف

ياكل رغيفه حاف

ويقول عمار يا مصر

إيدك على المجداف

الثوره فوق الاكتاف

شايله علم رفراف

بيقول عمار يا مصر

الرواي: الفلاحين في الأرض قادوا كلمتك قناديل .. وشافوك في
قلب السما .. قمره في عز الليل .. إيدك بتسند عرابي ..
وعرابي عند الفلاحين النيل .. والأرض .. والقواديس ..
وفرحة الفوانيس في إيد العيال .

المغنى: عجبى عليك يا خال

إيدك تنقّط ماس

والطين تشقه الفاس

وانت يا دوب بالكاد تلقط زادك

عجبى عليك يا خال

تدى شقاك للناس

إيه يجرا لو بالفاس

تقوم .. تدق .. تشق راس جلادك

الرواي: الانجليز أغروك تمد ليهم يد .. تهجم على المهديه في
السودان .. وينصبوك على شعبها سلطان .. قطعت إيد
الانجليز من قبل ما تتمد .. ولعت ساعة الجد .. زى السيف
في ضى الشمس .. وبدرت حب الثوره في كل أرض .. طرح
حماس في الناس .. شاف الاحتلال انّ صوتك .. بيدك باب
القلاع المنيعه .. مدوا إيدين الخديعه .. ونفوك بعيد عن
مصر .. من بعد ما حاصرت نيران الثوره باب القصر .

المغنى: بعيد وصوتك معانا

عايش في أرض الكنانه

بیشد عزم الرجال
بعید وصوتك معاول
تنزل تدك السلاسل
تطلع تهز الجبال
بعید وصوتك بیارق
من فوق عیون البنادق
بتخطی بینا الخال

الراوی: وبعد طول المطاف .. وبعد ما شاه ایران .. حط ف إیدیک
السلاسل .. ولبسك هلاهیل .. حوّدت یا طواف علی
استطنبول .. ورمیت هناك الحمول .. مشوار طویل لم حد
يقدر علیه .. وحمل لو شاله جبل لیمل .. تقصر سنین
العمر لكن قصتك بتطول .. ينقلها جیل عن جیل .. تنفض
عن الإسلام غبار السنین .. وتخلّصه من عمم .. عشش فی
شالها البوم .. وتقدمه للناس .. وکانه ابن الیوم .. ثوره ..
وطریق للخلاص .

عبد الله النديم

65

الراوي: ما كانش له فى الكلام المزوق .. ولا كانش له فى الرجال
الغنى .. كانت حوارى اسكندريه كُتَّابه .. والحياه عريّف ..
والناس أنين الناي .. عاش فى البلد سواح .. يقرأ التاريخ فى
الجراح .. وفى الزقاق السد .. وفى الحوارى الطين .. وفى
السنين الأنين .. وف بؤس عيل هزيل حفيان يمد الإيدين ..
عاشر حياة القصور .. وعاش حياة القبور .. شاف الطريق
الضلمه فى عيون الحوارى الذل .. شافك يا نيل بتطل ..
على جنبه حاميه حراميه .. فيها القمر ماشى على
الأشواك .

من قلب درب الصعلكه والهم .. من قعدة الحشاشين .. من
رطنة الزجالين .. عرف النديم الحياه والقوافى .. والنكته

والمواويل .. عرف عزيز الخطاوى ليه نهارها ليل ..

المغنى: فين الأمان يا مصر .. فين الأمان

يا امه الغريب دفيان

وابن البلد عريان

ميت بلا أكفان

فين الأمان يا مصر

البحر موجه غريق

والبر ما له صديق

وتاه من الخاليق

ضل الطريق يا مصر

يا امه الطريق مسدود

الماشى فيه بيعود

واللى اتولد مفقود

ما لوش وجود يا مصر

الراوى: عرفت حياة النديم جميع الصنايع .. تاجر وافندى

وصايع .. وعاش حياة الشريد .. شافك يا مصر ابتسامه

مقتوله فوق الشفايف .. مدبوحه فى كل عيد .. وف ساحة

العتبه لمح النديم الطريق .. وف ركن قهوة ماتتيا مال

الصديق ع الصديق .. صافحت ايديه البارودى ، وسعد ،

والشيخ محمد ، وشد على إيد عرابى .. وقاله مصر الغريقه

يحس بيها الغريق .. سمع الكلام النور من الأفغانى : طول

ما الفساد فى القصور.. والفلاحين فى البيوت القبور..
والجهل ملؤ الصدر.. يبقى العلاج الوحيد.. الدم..
والثوره.

المغنى: أول ما نبدى نقول يا سلام
أهديك يا مصرى ألف سلام
عين الشعوب عمرها ما تنام
وانت اللي فى الدنيا مناره

إيد المرابى خانقانى
طالت هدومى.. ودكانى
وجايه تاخذ إيه تانى
ما عادش فى الجيب ولا باره

الباشا عمال يدآين
بيبنى ف شوارع ومدآين
وقصور وحواليها جناين
واحنا بنشحت فى الحاره

يا مصرى هات إيدى فى إيدك
الصبر عمره ما حيفيدك
يا مصرى قوم كسر قيدك

والفجر له ألف أماره

الراوى: كان النديم للثوره حاديها .. من دمّه يديها .. شجر النيران
يخضر .. ويوم ما عود الثوره بإدين الخيانه انكسر ..
وعرابى بإدين الخيانه اتنفى .. قام النديم واختفى .. تسع
سنين اختفى .. ما كلّ يوم ولا ملّ .. ولا حس مره بضيق ..
ولا مره تاه من بين قدامه الطريق .. وعاش فى سجنه
الكبير .. للثوره أوفى صديق .

ويوم ما مات النديم .. فى المنفى ، كان فى وداعه .. رفيق
كفاحه القديم .. تسلم يا أفغانى .. ما ضاعش صوتك هدر ..
صوتك وصوت النديم فى صوت رفيقكو ظهر .. ف عام ١٩ .

أحمد عرابي

الراوي: قبل الإدين الخفيه.. ما تحول البندقية.. على التاريخ
تنسفه.. تعالى نحكى لولادنا.. ونحكى لولاد ولادنا..
عشان ما تفضل بلدنا.. جدورها دائماً عفيه.. متبته فى
الأرض.. قال المثل يا بهيه.. الدم ما يبقى ميه.
من ميت سنه واكثر.. المعركة قامت ما بين القصر
والعسكر.. توفيق خديوى مصر.. كان فوق حصان
الانجليز برده.. أمر على العسكر.. ضابط بليد
شركسى.. بيعض فى ولادنا.. ويخاف إذا الفلاح لبس
كاكى.. هو التاريخ يتنسى؟
عرايى كان فلاح.. عشق السلاح والأرض.. وعرف منين يا
بهيه بتصيبنا نار الجراح.. وف يوم عرايى ما قام اتصدى
للشركس.. ونطق بكلمة حق.. قلب الخديوى انشق..

قبضوا على عرابى وخدوه على القلعه (١) .. والقلعه طول
عمرها زنازة الثوار .. ما فاتش ليل ونهار .. إلا وعساكر
عرابى الفلاحين السمر .. بيحاصروا فى القلعه .. ويخلصوا
عرابى .

المغنى: حبسوا النهار فى القلعه
الشعب قال الضى جى منين
حبسوا النهار فى القلعه
الضى طلّ ونور الميادين
حبسوا النهار فى القلعه
لحوا النهار طالع من الزنازين
حبسوا النهار فى القلعه
الشعب قال مين اللى يقدر مين
يحبس شروق الشمس فى القلعه؟

الراوى: وما فاتش ليل ونهار .. إلا وميدان عابدين .. ينشقّ عن
ألوفات .. وعرابى بينهم علم :
الحديوى: عرابى .. تركت ليه ثكنات .. وكثير كثير ضباط .. إيه
اللى جابهم هنا؟

عرابى: أنا .. وباسم دول كلهم واقف وباتكلم ..
الحديوى: أفهم بإنك جى تتظلم؟
عرابى: أنا جى رافع مطالب .. وباسم شعبى باطالب .. الشر كسى

ينشال .. ومجلس الشورى يتولّى بيوت المال .. ويدبر
الأموال اللى تسد الدين .

الخديوى: تبقوا كده مجانين .. !

عرايى: نبقى صحيح مجانين .. لو سينا إيد الأجنبى تلعب .. لو
سينا إيد الأجنبى تنهنا باسم الدين .

الخديوى: إسمع عرايى كلام .. نحن سليل باشاوات .. إنتو عبید
إحسانات .

عرايى: من إمتى كنا عبید؟ وورثتنا عن مين؟ عن أهلك الجعانين؟
داحنا لولانا ما كنت انت ولا أهلك يساواوا القرش .. إسأل
جدودك تدلّك .. جدك رفعناه بإيدنا وخطيناه ع العرش ..
وقلنا يا باشا اطلع .. واحنا اللى نقدر بكلمه .. نطوى
بإيدنا البساط .. ونقولك انزل .. فتنزل .

الراوى: دخل الخديوى اترمى على جزمة الأجنبى .. ورجع عرايى
احتفى بالجيش وحضن الشعب .

المغنى: الله الله يا بدوى جاب اليسرى

قال الأديب الأدباتى

طول ما الخديوى بيطاطى

حيجيب عاليها فى الواطى

ويا ألف حسره على الأمرا

ضرب النديم تعظيم يا سلام

وقال ما فيش فى الدنيا سلام
غير لما تدور الايام
وتبقى فى إيدين الفقرا

بدر النديم فى الليل أشعار
زرعت فى قلب الضلمه نهار
طلع النهار طرحت ثوار
بيحلموا بمصر الحره

عرايى .. والحق يمينه
بيسن فى الليل سكاينه
ساكن فى قلب محبينه
إحنا السما وهوا القمره
الله الله يا بدوى جاب اليسرى

الراوى: عرايى هز الرعود فى كل عود أخضر .. وقال محال يا
مصر .. تطاطى يوم للقصر .. حلف اليمين ما تعيش مصر
الأفنديه .. وعمار يا مصر الفلاحين .

الانجليز والخيوى اتجمّعوا ف صحبه .. شافوا ف عرايى
الخطر .. كرباج أفندينا لم عاد يطول الولاد .. اتعاهدوا
يتقاسموا البلاد والزاد .. والتبر بتراب الفلوس يتباع ..
الكلمه للأجنبى .. واللقمه للأجنبى .. والعرش فرش

التيوس .. قول يا تاريخ ما تخافش .. واجلى الصدى م
النفوس .. هوا عرابى انهزم؟؟ .. عرابى يوم قابل جيوش
المعتدى ف الوش .. اتنطورت كالقش .. وأكلها نار العناد ..
اللى اتولد فى الولاد .. هزمت عرابى الخيانة .. هزمه الخداع
والغش .. فكّرت يا عرابى يوم تردم قناة السويس .. وتسد
كل المداخل .. فى وش كل اللى داخل .. لكنهم خدعوك ..
وأخذنا منك يا عرابى الدرس .. إنك فى وقت الحرب ما
تآمن لآخوك .

وآدورت الايام ، والعرش أصبح حطام .. واسمك انت اللى
باقى .. وصوتك انت اللى باقى .. بيحذرك يا بهيه .. لو فى
السنين اللى جايه .. ظل الخديوى يعود .. يدّارى فى
الجلابيه .. صحى الولاد يا بهيه .. خلّى السنين اللى جايه ..
تجبل .. وتولد عرابى .

(١) الحقيقة التاريخية أن عرابى ورفاقه قد حُمِلوا إلى ثكنات قصر النيل ، وقد
قصد المؤلف بالقلعة مجرد إسقاط على العصر الحالى .

محمود سامی البارودی

الراوى : لو كان فى إيدى قلم لَعملت سنه سيف
لو كان فى إيدى سيف لَعملت حده قلم
اشحال بقى .. لو كنت باملك سيف وباملك قلم .
قلبت صفحه تاريخك .. لقيت أمير البيان .. ولقيت خبير
البنادق .. فنان فى نحت القوافى .. فنان فى حفر الخنادق ..
خلصت شعر العرب من القوافى الذل .. ونفضت عنه رطنة
الممالك .. طلعت م السراذيب .. وم الأكاذيب .. رجعت له
توب الليالى الربيع .. فى فلسفات المعرى .. وحكم أبو
الطيب .. وسلاسة البحترى .. وكان من الممكن يعيش لنا
شاعر .. ترفع به رأسها مصر وتفاخر .. وتقول كفايه
البارودى .. نقى الذهب م التراب .. خلص قوافى الشعر م
السكه الخراب .. لكنه كان شاعر وكان فارس .. ماسك

سيفين فى الإيد.. الحد والكلمه.. لو مد إيده للسما..
يقدر يصيد نجمه.. ويعيش حياة القصور.. وسيرة
الباشاوات.. لكنه شاف فى القصور العفن والركوع..
والجوع بيطفى شعاع الجموع الشموع.. وشعب عايش فى
الشقوق الطين.. شال عن كتافه الرتبة والنياشين.. ووقف
مع عرابى فى صف الشعب.

المغنى: ابن الأصول تعرفه فى ساعة الشده
أوعى الصفيح يخدعك وتفكره فضه

والناس معادن

ما تقولش اخويا.. وابن ابويا وامى
أخوك صحيح.. اللى يقول أفديك بدمى

والناس معادن

يوم ما البارودى قام وشاف مصر الغريقه
فات القصور وراح يدورع الحقيقه

والناس معادن

يوم ما البارودى قام وشاف نار المعارك
داس الرتب وشال سلاح وراح يحارب

والناس معادن

الراوى: مسك البارودى فى يوم الوزاره.. وكان عرابى ناظر
الجهاديه.. قالوا بعلو الصوت.. نموت والا الأجنبى.. يبقى
الحكم والمشوره.. ولا فيش مكان للأجنبى فى الدار..

يومها الخديوى ثار.. ساعة ما شاف النار بقت أسوار
محاوطة القصر.. وأصر يبقى فى الوزاره اتنين.. واحد
فرنساوى.. والثانى سكسونى.. عشان يصونوا حقهم فى
الدين.. ساعتها ثارت فى البارودى عزة المصرى.. وساب
مكان الرياسه.. ومال على أحمد عرابى.. وقاله سيف
السياسه.. تحميه سيوف المعركة والحرب.

المغنى: الأوله يا نار

والثانيه يا تار

والثالثه ثوار

الأوله يا نار كونى السلاح والحد

والثانيه يا تار الصبر دا له حد

والثالثه ثوار نرمى الجبل يتهدّ

الأوله يا نار كونى السلاح والحد بين الظلام والنور

والثانيه يا تار الصبر دا له حد يجيله يوم ويثور

والثالثه ثوار نرمى الجبل يتهد يوم الرحى ما تدور

يا جرح طوف بالبلاد

صحّى اللهب فى الرماد

يا جرح طول ما انت صاحى

دمك بشاره الميلاد

الراوى: وفى يوم ما جيوش بريطانيا.. دخلت من باب الدار.. قام

يومها محمود سامى.. مرّغ سمعة بريطانيا فى تراب كفر

الدوار .. سجّل يا تاريخ .. إن اللي بيرهب بالصواريخ ..
سكان الأرض .. ما قدرش بجيشه وبالصواريخ يهزم فلاح
من مصر .. ما قدرش بالمواجهه .. يصد زحف شعب .. لكنه
بالخديوى .. والغش والخداع .. ضاع مننا اللي ضاع ..
إيه اللي كنت ف يوم بتحلم به .. يا بارودى .. بمصر
مستقله .. بجمهوريه تنهى مذلة القصور .. ببرلمان
وشعب .. يدافع عن حقوقه .. وان حد خان طريقه .. يقدر
يقوم ، يثور .. لاياام كتيره جاّيه .. وشعب مصر يقدر يتحمل
الأسيه .. وشعب مصر يعرف .. إن اللي ضاع تحببه ..
رصاصه بندقيه .

عبد العال حلمى (١)

الروای: إِدینی إیدک أبوسها

إِدینی حفته من ترابك أبوسها .

مین الی یعشق بهیه ویصونها إلا فارسها .. فرسانك
المفتونین یدوکی لم یبخلوا .. یدوا ولا یقبلوا یبقی لهواهم
شريك .. عایشه ف نایاتهم نغم .. عایشه ف حیاتهم
صباح .. لو حد مَسَّك أو رماکی بهم .. یلقى نایاتهم
بنادق .. یلقى الرصاص فی النغم .

الإسم عبد العال .. عاشق رماه الهوى بالغنوه والموال ..
عرقك على جبینة .. والنیل شرايينه .. وعینیه علیکی ناس
وسیف حراس .. واللی بیذکر فی تاریخك عرابی .. واللی
بیکتب فی الدفاتر قصة الثورات .. یقف ویحني الراس
لعبد العال .

الراوي: عرابى كان القلب للثوره.. والفكر عبد العال.. يرمى عليه السؤال.. يفكّ حيرة السؤال.. وقالوا عبد العال.. دراع عرابى اليمين.. وكان دراعه الشمال.

الشركسى رفقى.. ناظر جهادية جناب الخديوى.. كان يكره المواويل.. ويكره كل من غنت عيونته لمصر.. ويكره اللى رضع من مَيْتِكَ يا نيل.. الشركسى رفقى.. أمر بنقل القائد المصرى من الآلاى للديوان.. كان الآلاى فى طره.. من قبل ما تكون ليमान للفكر والأفكار.. وفيها عبد العال.. كان على كالنخله.. رايق كما الموال.. كان يزرع الكلمه بتضوى كما النجمه.. تهدى خطا الثور..

الراوي: توفيق خديوى مصر.. فكَرَّ بِإِن الرجال لقمه حيهضمها.. لكنه جاله الجواب.. السن بالسن والبادى يكون أظلم.. خط الرجال مكتوب.. بيحذره ويؤمره.. إِنَّ الآلاى فى طره.. باقى.. وعبد العال.. م المستحيل ينشال.. ورفقى ناظر جهادية جناب الخديوى.. مالوش مكان فى الجيش.. وشعب مصر يعيش مُطاع وأمره مجاب.. مافيش مكان للفرد.. ولا حد ينطق كلمه باسم الشعب.. غير مجلس النواب.

شد الخديوى الرجال.. على فهمى وعرابى وعبد العال.. من غير كلام أو سؤال.. وف سجن قصر النيل فتح الخديوى ببيان المحاكمه.

المغنى: خلوا الشوارع سجون
واملوا الشوارع عيون
كل المشائق ما تكثر
الثوره لازم تكون
سدوا الطريق ع النهار
رشوا المسالك بنار
من قلب ليل الحصار
الثوره لازم تكون

خلّوا الليالى الحزينه
تملا حوارى المدينه
طول ما احنا بكره ف إدينا
الثوره لازم تكون

الراوى: على فهمى مال فى الركن متكوم .. مرسوم على صورته
الأسى والهم .. اتذكّر الأحباب وأهله وناسه .. واتصور
الثوره وبيحر الدم .. وجنبه قاعد عرابى .. كما فجر فوق
الروابى .. كما رواسى الجبال .. وقصاده عبد العال .. هادى
كما النسمة فى فجر ربيع .. لم قال ولا كلمه .. ولا فارقت
البسمه .. قبل الخطاوى ما تاخده لحد باب السجن .. هو
اللى كان عارف .. الخطوه رايحه لفين .. ورفاقه مش فاهمين

على إيه بيتبسم .. ولولاك يا عبد العال .. ما انشقت
الضلمه .. ولا طل منها نهار . فات فى الآلاى كلمه .. لو
غبت عن ساعتين كل الرفاق عارفين .. لحظتها تعمل إيه ..
وف لحظه كان جيشك يا عبد العال .. واقف بيتحدى ..
أسوار سجون القصر .. وانهارت القضبان .. واتهد ليل
الأسر .. والشمس طلّت فى سماكى يا مصر .. وساعتها
عرايى وفهمى .. أخذوك بالحضن وفهموا .. كنت بتتبسم
ليه .

المغنى: يا مصر لسه اللى جى

أكثر من اللى .. راح

والفجر ما يرمى ضى

إلا ف عيون السلاح

يا مصر غيرك ما ليش

وقبل حبك ما فيش

وبعد حبك ما فيش

انتى الدوا .. والجراح

أشوف عيونك أسمى

وف غنوتك أنسى همى

وبكلمه .. أديكى دمي

ما اندم فى يوم ع اللى راح

يا مصر لمى الولاد
من طول وعرض البلاد
خلّى الإدين ع الزناد
لحين يطلّ الصباح

الراوى: ومشى الرفاق ع الدرب .. القلب بيشد الوتر ع القلب ..
والغنوه واحده ف كل فم .. الإسم عبد العال .. الإسم فوق
الصوارى علم .. فيك الكلام ابتدا .. لكن ما جاش الختام ..
طول ما الكلام عن مصر .. ورجال بتحلم بمصر .. وتموت
فداها عشان تتحقق الأحلام .. حيطول ويحلا الكلام ..
حيطول ويحلا الكلام !

عبد العال حلمى (٢)

الراوي: فتحت كتابها وقالتلى : لو كنت قاصد طريقى .. إقرأ
صحايف كتابى .. تلقى التاريخ الحقيقى .. طول عمرى
قلبى دلىلى .. أحس باللى بايعنى .. واحس باللى شارينى ..
واحس باللى واخذنى للنار، وباللى حامينى .. أبص فى
عيون ولادى .. أعرفك مين عدوى .. وأعرفك مين
صديقى .. مين اللى عايش بيحلم، بفجرى وبنور صباحى ..
ومين مسدد سهامه، ع الشمس ساعة شروقى .. كان النديم
من ولادى .. وعرابى كان من ولادى، وحلمى كان من
ولادى .. رضعتهم من عنادى .. حطوا القلوب ع الأيادى ..
وجانى صوتهم ينادى .. أموت وتسلم بلادى .

كورس: قالوا الكلام يحلا فى سيرة الأبطال .

الراوي: قلت الكلام أحلا فى ذكرى عبد العال .

كورس: احكي لنا يا راوى .

الراوى: يحكي لكوا صوت المغنى بالغنوه والموال .

المغنى: كلام كثير ينقال

فى ذكرى عبد العال

يوم مرّ حضرة الأجنبى بسياره

ما همّه مين اللى ماشى ف عطفه أو حاره

مرّ وقتل .. تحت العجل

جندى من الأبطال

إخوانه يوم شالوه

وعلى الكتاف رفعوه

وعلى الخديوى خدوه

دمه أمانه .. وتار

اللى قتل طلقوه

واللى انقتل سجنوه

لحظة ما شاف اللى جرى

سطر بإيده مذكره

بتقول لباشا القصر

ما نتش حتسجن مصر

ما نتش حتقتل مصر

واللى انقتل

تحت العجل

محال يضيع دمه هدر
الكورس: أمال كان فين محمود سامي
مش كان مسئول الجهاديه؟!

المغنى: احتج وساب الديوانيه
ولا عادش وزير الجهاديه
وقف وقال
من المحال
أشوف جنودى فى السجون يتسلسلوا
وإيه أكون
لو سبتهم جوا السجون
عشان عيون الأجنيبي.. يتبهدلوا

الراوى: الثوره عاشت كالأدان فى الشوارع.. والنار عِلت كالموج فى
قلب العواصف.. والباشا متلفع بدرع الخوف.. وجنبه
واقف جناب قنصل بريطانيا.. بيطمئه بالحرا ب.. ويشق
بيه الصفوف.. يوم شار عليه ينزل إلى الشكنات.. ويحذر
الآلايات.. من اللي ناوى عليه عرابى، ورفاقه.
طاوعه الخديوى وطلع للقلعه يتحضر، ويولف الحكايات،
الى حينزل بيها للعسكر.. وساعتها صقر الجبال، فى
شخص عبد العال.. انقضّ ع الباشا، ولخبط الحسابات..
حاصر جناب الخديوى، ورجاله فى القلعه.. ولا فكّ يومها
الحصار.. إلا اما خلّى الباشا والسمسار.. يرجع كما الفار

لجحره في سراي عابدين .. والجيش طلع ع الميدان .. وكان
يومها اللي كان .. وف وقفتك ، يا عرابي .. وطلعتك ع
الحصان .. كانت بداية الثوره ، والعصيان .

المغنى : يا ساده يا كرام
قبل اتصال الكلام
نبعت تحيه وسلام
لزعيمنا عبد العال
كورس : ألفين تحيه وسلام .. لزعيمنا عبد العال .

المغنى : ليلة ما نادى وقال
خلع الخديوى حلال
والعرش دا ينشال
ومصرى يحكم مصر

المصرى بيها أحق
والجمهوريه حق
مين اللي حيقول لأ
لو يوم هدمنا القصر
الراوى : كان التاريخ يومها حيتغير .. لا كان عرابي انكسر ..
والفجر كان عدى بحور الخطر .
ويوم ما صوب الانجليز المدافع .. قال القناه تتردم لكنه قلبه

انخلع .. لما عرابي بالوعود اتخدع .

كورس: سلطان ورجالته .. كانوا إيد مع الثوره .. وإيد على الخنجر .
الراوى: ويوم ما عبد العال .. نادى بخلع الخديوى .. سلطان
ورجالته أول من استنكر .. ويوم ما عبد العال أمر بردم
القنال .

كورس: سلطان وقف حذر .. سلطان وأعوانه خلّوا الخطوه تتعثر ..
ويوم ما داهم الانجليز القناه .. سلطان ورجالته كانوا عين
على الثوره .. وف ضهرها الخنجر .. أعوانه خانم عرابي ..
وكانوا دليل الانجليز والقصر .

المغنى: مش كل من شالوا السلاح فرسان

فيه وسطنا المخلص

ووسطنا الخوآن

واللى بيتجسس

ويعاون السلطان

إلى عرف يا عم

كيف الدينار يتلمّ

من غير تعب أو همّ

عمره ما يدى لأرضه نقطه دم

ولا يدى يوم غير عضه التعبان

مش كل من شالوا السلاح فرسان

على الطريق يابا

فيه خطوه غلابه

وخطوه كدابه

تتمنى لو تبقى الجنائين ، غابه

علشان ما يبقى وحشها السعران

مش كل من شالوا السلاح فرسان

الراوي: كان حلمي ظهر الثوره في دمياط .. ويوم ما جاله الخبر ..

عرايى جيشه انكسر .. كتم الخبر لم قاله للعسكر ..

والشعب عاش يقرأ عن سيرتك يا عبد العال .. ومنك اتعلم

كيف السلاح يتشال .. وكيف يكون النضال .. وكيف

يكون العشق للثوره .

مصطفیٰ کامل

الراوى: مشت فى المدينه الليالى الحزينه .. ناطقه ف عيون الناس ..
والدنيا رغم اتساعها .. أشبه بزنانه .. والصمت عشش فى
الشوارع، فاقد الأنفاس .. الناس تروح على فين؟ ..
السجن والجلاد، وسيف حراس .. ولا فيش طريق تانى ..
ليل الوطن قضبان .. وضلمه طالعاه السكك جدران،
وصوت سجان .. يتلفع الإنسان بشال القهر .. يمشى
الخطاوى الضباب .. ويعايش الأحزان .. مصر اللى عاشت
جنة الإنسان .. زاحف عليها الخراب .. اتفرقوا الفرسان
على السكه .. أحمد عرابى اتنفى .. وصوت (نديمه)
اختفى .. وانقضت العرکه بسيف مكسور .. وباشا، بيمنح
البركه لجلادها، ويقفل كل طاقة نور .. بات الطريق
مرصوف بخوف .. بيفرق الصفوف .. والحق أخرس فوق

ضفاف النيل .. والحق من يقدر يفك عقدة لسانه ؟ !
كورس: بهيه تعرف العشاق .. وتعرف من على بابها عشق
واشتاق .. ومن يقدر يخلصها .. ويبقى للجراح ترياق .
كورس: بهيه يا ساده .. حباله ولأده .. بهيه يسقط بين أيديها علم ،
ترفع علم .. وف شدة العتمه .. صَحَّى الحياه والنغم ..
صوت مصطفى كامل .. صوت اللسان اللى قاد الصمت ..
وولع الكلمه .

كورس: قالوا عليه المتيم .. قالوا اللى ضيع حياته .. فى حب طلعة
بهيه .. قالوا رفيقة شبابه .. هيّه صحايف كتابه .. هيّ
العلم ، والقضيه .

المغنى: تصحى ف مصر الكلمه النور

ترجع تانى وتملا الدور

واللى يعادى

مصر .. بلادى

عمر عينيه ما تشوف النور

الكورس: كان لفحة النار اللى عاشت بتنذر .. وصرخه بتصحى
بكره .

مصطفى: أنا كنت صوت الشهيد والقضيه

وكنت صوت دنشواى الجريحه

وكنت صوت الرعود اللى جايه

المغنى: دنشواى

يا صوت أنين الناي

يا دم هز المشانق

دمك رفعت بهيارق

دنشواي

يا جرح صاحي ف غناي

جرحك عيون البنادق

جرحك حفرته خنادق

دنشواي

ناديتها لبّت نداي

سهران على السكه جاي

آخذ بتار دنشواي

مصطفى: لكن يا أبنائي

يوم ما ناديت بالجلاء

الشعب ردد ندايا

وزي ما شئت .. شاء

وكل دا مش كفايه

حبر القلم والدوايه

من غير رعود السلاح

ما يجيبش يوم الجلاء

المغني: خلوا الرصاص في الكلام ينطق

خلوا الكلام في الرصاص ينطق

يوم ما السيوف
تاخذ الحروف فى حضنها
الحرف ينزل ع العدو.. يحرق

الراوى: البدر شق الغمام.. والشعله قادت فى السما أيام.. ورمت
لهيبها فى عيون البشر.. شرخت جدار الصمت.. ومن
الشقوق طلّ الكلام وانتشر.. بيقول حذار يا مصر..
ماهش كفايه الحماس.. الكلمة يشعلها لهيب الرصاص..
واللى ارتموا.. واحتموا، براية الأجنبى.. همّا سبب
دائك.. أرضك لأبنائك.. خيرك لأبنائك.. وحذار.. حذار
يا مصر.. م اللى يمد الإيد لأعدائك.

دندشواى

الراوي: من غير ما يعرف قد إيه البؤس عشش في الغيطان .. وعلى
الشجر .. ورسم خياله ع البيوت ، صبار .. وجمرة نار ..
ورعشة جرح في قلب الصبي .. من غير ما يعرف يا بهيه قد
إيه كنتى كسيرة القلب .. مكسورة الجناح ؟ .. من غير ما
يعرف قد إيه كان الخطر .. طار الحمام .. وسبح في أحضان
السما .. واخذ في حضنه الشمس في عز الضحى .
كنا يومها ف دنشواى .. ساعة ما كان القهر شلال
الشقا .. وبندقية ومشنقه .. طارت رصاصة القهر في قلب
الحمام .. طاشت وصابت صبيه .. والجرح صار بندقية ..
بتلاحق القاتل .. لكنّه ، من قبل الإيدى ما تحصله .. كان
مات بضربة شمس .
وقامت القيامة .. صبح القتل قاتل .. ولسه دم الصبيه ع

البندقية ، علامه .. مين ينتصر لك يومها يا دنشواى ؟ اومين
يداوى الآهات الجريحه فوق شفايف الناي ؟ مين اللى ينطق
فى ساعة الشده كلمة حق ؟ مين اللى ينطق فى ساعة الشده
كلمة حق ؟ !

المغنى : زهران

يا زين شباب البلد
الحق قدام عينيك ، وسط الميدان انجلد
ما هزتك بنادق
ما هزتك مشانق
ما هز قلبك سيوف الجلادين .. والشنق
ومشيت يا زين الرجال
والخلق موج الميدان
هامتك رافعها لفوق
ومشيت .. يا زهران
والخلق موج الميدان
وعينيك بتسأل بهيه
مين اللى بات مشنوق ؟

الراوى : ومشيت يا زهران ، والخلق موج الميدان ، وعينيك بتسأل
بهيه .. مين اللى بات مشنوق ؟؟ الجلادين .. زهران .. والا
أمل بكره .. والا حبال المشانق .. كانت فى صوت زهران ..
حبلانه بالشوره .. حبلانه بالشوره ؟؟

محمد فرید

الراوي: صحيتنا من ٧٠ سنة .. واديت لجيلنا الدرس .. عرفت
جيلنا ان الكفاح طريقين .. واحد بيصنع م الرجال تجار ..
ياخدوا ولا يدّوش .. والتانى يصنع م الرجال ثوار .. يدوا
ولا يخذوش .. مين غيرك اللى يردّع السمسار فى سوق
السياسة .. مين غيرك اللى يصد من باع الحماسه بالوعود
والمال .. مين غيرك اللى يقول لصناع الكفاح فى السيارات
والفيلا والتكييف .. إن الكفاح جروح، ودم، وشقا ..
وساعات يكون تمن الكفاح مشنقه، طعم الكفاح فى لقمة
الفقرا .. وف كلمه تعرف مين .. فى الشعب يقدر يصنع
الثورات .. مين غير محمد فريد .. يرد عنك يا مصر ..
سهام اللى خلّوا م الكفاح حرفه .. وكاس وسهره بلون دم
الشهيد .. يوم قلت تحرم جلسة الصالونات .. والشعر لو

غناش بصوت الناس .. يموت من قبل ما ينطق .. والثوره من
غير جموع مسيرها يوم تغرق .. وعشان كده .. كنت أول
من لمح فين الطريق .. ومين من الخاليق هوأ أمل
بكره .. حضنت بيدك إيدين الشقيانين فى الأرض ..
وسواعد العمال .. وقلت عمر النضال ما يصد زحف
الديابه .. إلا ان لمت ألوف الجموع النقابه .

المغنى: النجمه طلّت م السما

على الخوارى المعتمه

شافت ألوف متنظمه

حاضنه المصانع

قامت ولمت شملها

المطرقه فى يدها

والثوره جمره ف دمها

ماليه الشوارع

زرعت لهيبها فى السما

قاد الليالى المظلمه

وقال يا مصر بالدم

نرد اللى ضايع

الراوى: يوم كنت فى بروكسل بتقيد شموع القضيه .. وتصحى فى

العالم ضمير ميت .. وبتدّى من دمك ومن مالك .. القصر
كان بيحضر الأتباع .. علشان يشلّوا خطاك .. وعشان ما
يطفوا شرارة نار بتزرعها .. قالوا فريد بيحرّض الشعرا ..
عشان يهاجموا نخاسين القصر .. والأمر .. وعرف محمد
فريد .. كيف تقدر القوانين .. تهدر دما الفقرا .. وتسوى
بين النور وبين الزور .. حطوا ف إيدين الزعيم السلاسل ..
ورموه لليل السجن والسجان .. قطع الزعيم الطريق
الضلمه لنهايته .. قاله مدير السجن :

- ليه انت ماشى فى الطريق الصعب ؟

- قاله طريق الشعب .

قاله مدير السجن :

- العفو أهون لك من القضبان .

- قاله المبادئ تهوّن غربة المسجون ، وترعش خنجر
السجان .

جاله رسول الخديوى وف إيديه العفو ، لو يطلب .. قاله

طلب مستحيل .. ولا حد له الحق يطلب عن لسانى العفو ..

لو حتى كان من أمير .

المغنى: حاربوا المبادئ بنار

طلعت عليهم نهار

حاو طوها بالسجان

طلعت من القضبان

بنوا عليها القلاع
طلّت تمد الشعاع
حطوها فى الزنازين
لقوها فى الميادين
حطوا ف إيديها السلاسل
طلعت تفرع سنابل
شدوا عليها الحصار
ملت البلاد ثوار
سدوا عليها الشوارع
لقوها وسط المزارع
لقوها وسط المصانع
لقوها فى كل دار

الراوى: خرج الزعيم من قبضة السجنان .. حوالية قلوب الناس
شموع الطريق .. بتشق سكه للحياه النور .. وبين إيديه
اتولد حلم الإيدين السمر .. فى الغيط وفى المصنع .. اتهمز
فى إيديين الانجليز الصولجان .. واترجّ عرش الملوك .. قالوا
محمد فريد بيحرّض العمال .. وحضّروا المحكمه والقاضى
والشاهد .. شاف الزعيم القيود الحديد .. والسجن فاتح
ببانه للزعيم من جديد .. صحى ، وقبل الأذان ما يصحّى نور
الفجر .. كان الزعيم ع السفينه اللى واخده الخطوه للشط
البعيد .

وعاش محمد فريد.. فى الغربه يكتب لمصر.. فى الغربه
يهتف بمصر.. ويوم ما حاصره المرض فى غرفته المعتمه..
ودق بابه الموت.. كانت بترعش قلبه كلمه مصر فى
الغربه.. ويجيله صوت من بعيد.. بيقول محمد فريد..
عايش فى نبض الشعب.. عايش فى نبض الشعب.

ثورة ١٩ (١)

الراوي: الثورة مش مكلمه.. ولا صنع ناس متنعمه ومرتاحه.. ولا صنع من عاشوا الحياه بالراحه.. ولا عمرها بتنزل هبه من السما.. الأصل فيها الشعب.. هوّا النشيد والدماء.. هوّا اللي تولد ثورته الزعما.. ارفع إيديك عن ثورة الفقرا.. دى مصر تكره ريحة الأمرا.. والانجليز والقصر.. ويوم ما قام الشعب بالثوره.. اختار لها فلاح.. لم كان أبوه عمده.. كان يلبس الطربوش.. كما يلبس اللبده.. عرف القُعادع الحصير.. واتمد فى الكتاتيب.. وداق عصا التأديب.. ما اختارش عدلى وصدقى.. ما اختارش واحد من ملوك العصر.. ما اختارش واحد من مطايا الانجليز والقصر.. اختارك انت يا سعد.. اختار بنفسه الزعيم.. تلميذ فى قهوة متاتيا.. وفى لثورة عرابى.. ورفيق كفاحه النديم.

الراوي: الانجليز قالوا عرابي عاد.. الوش فلاحى.. والكلمه نفس
العناد.. وزى وقفة عرابي فى ميدان عابدين.. حطمت
هيبة القصر.. وناديت بالاستقلال، وبالدستور.. وقفت
وراك ملايين.. شاوروا عليك بالإسم.. وفوضوك بكتاب
خطوه بدم.. لسعت إيدين الانجليز النيران.. مصر الحمايه
حاتفلت من إيدين العنكبوت.. قبضوا عليك يا سعد..
ونفوك على مالطه.

المغنى: قولوا لعين الشمس.. ما تحماشى
ألا غزال البر صابح ماشى

قولوا لعين الشمس
الضلمه صوت الهمس
واللى جرا بالأمس.. ما يجراشى

يا عاشقين الضىّ
الضىّ فات الحى
واللى عشق نوره ما يتوصّاشى

قولوا لغريب الدار
البر قايد نار
والظلم فوق الحق ما يعلاشى

الراوي: واتفجّرى يا مصر ضد المعتدى كاللغم .. الدم يصنع غنوة
الحرية .. والشمس ما تطلع بغير الدم .. الاسم كان نجم
ساطع .. والنجم سعد الطوالع .. الثوره لم فاتت زقاق ولا
حتى .. الثوره كانت ثورة الشارع .. كانت أذان الجوامع ..
ورنة الأجراس فى حضن الكنايس .. طاشت فى إيد الانجليز
البنادق .. ساعة ما شافوا ابن مصر .. صبح رصاصه ، بندقيه
وخنادق .

المغنى: علّمنى صوت الشعب كيف انطق وأتكلم
علمنى سيف الشعب كيف أحكم ولا اتحكّم
واللى سلاحه الناس
والطرقة والفاس

ما تترعش كلمته ولا عمرها تسلم

الراوي: وعُدت يا سعد للأرض اللى جبلت بيك .. وعرفت كيف
الشعب يبقى القلعه والمتاريس .. وعرفت كيف الزعيم ،
تحميه كتاف الشعب .. تحميه دما الشهداء .. وعرفت يومها
الشمس ، شعاعها جى منين .. وف حضن مين يا سعد تلقى
الدفأ .. لقيت حصنك فى حضن الشعب .. سلمت له
المركبه والقلع .. والدفه .

ثورة ١٩ (٢)

الراوي: الفرز لما ابتدئ .. خد سعد في جانب ، وف صوته صوت
الشعب .. وعدلى في جانب .. وف صوته صوت الانجليز
والقصر .. كان سعد الاستقلال ، وصوت الفلاحين بالفاس ،
والفقرا والخافيين .. وعدلى كان جلاد .. يضرب بسيف
الاسياد .. إيد الفقير اللي عاشت تطعمه بالزاد .. إيد اللي
سماهم رعاع .. إزاي رعاع البلد راح تحكم الباشوات ..
وتحارب الخواجات .. وازاي يقوم دستور يجيب الأجر
والفقرا .. م الأرض والسخره .. يتكلموا باسم مصر ..
وازاي يقاطعوا لجنة الخواجات .. وازاي عزيز الانجليز
"ملنر" .. يعود من غير ما تحصد إيديه .. حتى الفتات .. ما
عرف يكلم حد .. يسأل يجيله الرد .. واحد في كل
مكان .. اسأل زعيمنا سعد .. اسأل زعيمنا سعد .

المغنى: الحى ابن اللى مات

والجى ابن اللى فات

وتقول لنا الحكايات

كيف رد شعبك يا مصر

على لجنة الخواجات

يا شاب كيف اقدر

أروح على البندر؟

يا خواجه اسأل سعد

يا عم يا فلاح

يا هلترى مرتاح؟

يا خواجه اسأل سعد

يا تاجر التجار

إيه آخر الأخبار؟

يا خواجه اسأل سعد

يا عم يا غنّام

فى اليوم بتاخذ كام؟

يا خواجه اسأل سعد

يا شایل الأحمال

كيف الحياه يا خال؟

يا خواجه اسأل سعد

الراوى: راح عدلى لاجلنْ ما يتفاوض مع الأسياد.. الشعب قال

جورج الملك قاعد يفاوض جورج .. وتقيدى يا شمس
الضحى .. صوت مصر فى الحلق والع .. يلهب زهور
البرادع .. بالدم والثوره .. دم الشهيد فى الشوارع .. عمال
بيكتب فى تاريخ بكره .. وغمست يا سعد مندليك فى دم
الشهيد .. ورفعته فوق السواعد علم ، وقلت دمه على
راسك يا عدلى سيف .. والحد بين النور وبين الزيف .

المغنى: طول ما-الشجره بتطرح ضلّه

طول ما كفوفك غيط الغله
طعم الموت على أرضك يحلا
لاجل تعيش مصر الحريه

طول ما النيل بيوجد ويوافى
طول ما عنيكى الحزن الدافى
أقدر أطول السما بكتافى
وأقتل ضل الخوف فى عنيه
لاجل تعيش مصر الحريه

كل ما اشوف الكون فى عنيكى
ألقى الفقرا شموع لياليكى
دم الفقرا العايش فيكى
هو نشيد أيامنا الجايه

لأجل تعيش مصر الحريه

الراوي: الثوره لفتت على كثاف الزعيم البلاد.. لفت ما فانت

مكان، من غير ما تزرع في حشاه النيران.. واتعمدت

بالدم.. في أسيوط.. كانت ألوف الألوف في انتظار

الزعيم.. يلهب حماس المدينه وتشد أزره الجموع.. ولما

هلت على الشواطى السفينه.. طلعت نيران الحمايه..

وانهال رصاص الاحتلال وعساكر الخونه.. وسعد واقف

على ظهر السفينه جبل.. والشعب طول عمره التاريخ

والبطل.. وقت اندفع في الميه يم السفينه م البشر أمواج..

تسبح ورا أمواج.. تحمى سفينة سعد بالأجساد.

طوف يا تاريخ بالبلاد.. واحكى التاريخ الحق.. واكتب في

كل سطورك الجايه.. ملعونه كلمة آه.. لو نخشى كلمة

لأ.. لسه ما عاش اللي يحكم مصر بالكرباج.. ولا عمر

شعبك يا مصر.. يوم ينحنى للقهر.. ولا لعصا الزعما..

الشعب هوأ البدايه.. والشعب هوأ النهايه.. وصاحب

الكلمه.. وهوأ بس اللي دمه يولد الزعما.

القَمَصُّ سَرَجِيوس

الراوي: العقد ليه انفرط؟.. ومصر ليه واخده الطريق الغلط..

الفتنه بين المسلمين والقبط.. طول عمرها لعبة مغامر

غبي.. مزقوق من الأجنبي..

زمان.. لعبها الانجليز والقصر.. ولسه لعبة زمان، شباكها

منصوبه ف سماكى يا مصر.. الحرب ما تفرق ما بين مسلم

وبين قبطى.. والحب بيجمع ما بين الاتنين..

المغنى: حب الوطن م العباده

وف حبه تحلا الصلاه

ومصر أم الجميع

أم الكبير والرضيع

نضال وثوره.. وحياه

مدى الإيدين يا مصر

زحف الخطاوى ابتدا

قومى .. ولبى النداء ..

الراوى: قومى يا مصر اهتفى بمصر الاستقلال .. قومى يا مصر
اهتفى بحياة زعيمك سعد .. يوم الانجليز شدوه ورا
القضبان .. قامت فى مصر القيامة .. وقمت يا سرجيوس ..
بصوت يعشش فى القلوب والنفوس .. وبطول علالى
الجال .. رسمت بين الجموع صليب بيحضن هلال ..
ومشيت على راس المظاهرة علم .. وكنت بين كل الحشود
النشيد .. وقضيت شهور وايام .. ف الجامع الأزهر ..
تخطب بقوه وحماس .. لمصر والثوره .. نزل كلامك على
قلب العدو جمره .. ولاجل مصر الوطن .. عرفت ليل
الاعتقال .. والعتمة فى الزنازين .. ويوم ما فك الشعب عن
إيد الزعيم السلاسل .. كنت انت أول من خدك بالحضن .

المغنى: صوتك رفعته ع المساجد صليب

صوتك رفعته ع الكنائس هلال

قلت لولادنا .. وكل أهل بلدنا

جرس الكنيسة .. يبقى جنب المدنه

يحضن صداه فى السما صوت بلال

قلت العدو لو حط رجله فى بيتنا

يلعب على جبل الخداع والفتنه

ويخلّى نور الحق يبقى ضلال

صوتك رفعته ع المساجد صليب

صوتك رفعته ع الكنائس هلال

الراوى: أبونا قال كلمته قبل الزمان .. بزمان .. قال الإيمان بالوطن

هو الطريق اللى بيوحده ما بين الاديان .. فى يمينك القرآن ..

فى يمينك الإنجيل .. الأصل فى الحب مصر .. الأصل حبك يا

نيل.

سید درویش

الراوي: غنّينا .. إملأنا قُدره وحماسه .. انبش بلحنك
تاريخنا .. ساعات نغم ع الربابه يفوق كتاب فى
السياسة .. غنّينا .. رُمّ شروخنا .. ساعات آهات المغنى
تبقى مخاض الولاده .. ساعات نايات المغنى يسبق نغمها
المعارك .. ويخطى حلم القيادة .
غنى يا شيخ سيد .. دخلنا محراب فنونك نسجد سجود
المتيم .. يا اللى جعلت الغنا فى مصر زى العباده .

المغنى: أنا المصرى .. كريم العنصرين
بنيت المجد فوق الأهرامين
جدودى أنشأوا العلم العجيب
ومجرى النيل .. فى الوادى الخصيب
لهم فى الدنيا آلاف السنين

ويفنّي الكون وهما موجودين(*)

الراوى: غنى يا شيخ سيد.. يا اللى أخذت النعم من دمه سياله..
وأياى شغاله.. وعرق جبين طالع على السقاله..
يا اللى أخذت الغنا من زقزقة عصفور.. من غنوة الطنبور..
من باعه جواله.. يا اللى أخذت الغنا من لوعة الفقرا.. من
أرضنا السمره.. غيرك يا شيخ سيد.. قام غنى للأمر..
واتسمى بالأمر.. وانت اللى خدت بغناك إيد الصنايعيه.

المغنى: الحلوه دى قامت تعجن فى البدرية

والديك بيدن كوكو كوكو فى الفجرية
ياللا بنا على باب الله يا صنايعيه
يجعل صباحك صباح الخير يا اسطى عطيه
طلع النهار فتاح يا عليم
والجيب ما فيهش ولا ملیم
مين اليومين دول شاف تلطيم
زى الصنايعيه المظالم

الصبر أمره طال.. وايش بعد وقف الحال

يا اللى معاك المال.. برضه الفقير له رب كريم(*)

الراوى: غنى يا شيخ سيد.. يا لحن إنسانى.. انساب فى وجدانى كما
انسياب الغدير.. انساب وصحانى على جراح الفقير.

شيخ سيد: اشحالكوا.. اشحال غناكو..

كورس: عايشين بصوتك معانا

شيخ سيد: قولوا لمن غنى بعدى.. مصر ف إديكم أمانه

أنا ابتديت وانتوا يعدى غنوا .. لمصر الكنانه
باركوا بغناكو الصباح .. التلى يجيبه السلاح
باركوا بغناكو المكن .. من صنع ابن الوطن
باركوا بغناكو سنابل .. رموشها زى السهام
فى الشده تقدر تقاتل .. وتبقى نور الكلام
كورس: والله .. يا شيخ سيد .. فيه اللى خان الأمانه .. واللى لا زال ع
الطريق .. وأدحنا عايشين نقاتل .. صوت الأغاني الخيانه.

شيخ سيد: صوت الأغاني الخيانه ؟ !

كورس: أيوه يا شيخ سيد .. مصر اللى غنيت عشانها .. عايشه
فقيره وجعانه .. وعند سفح الهرم .. عايش فتات النغم ..
يفوح بريحه النتانه .

شيخ سيد: يا رايحين .. يكفيكوا شر الخطا الجايين .. هوا الغنا يبقى
غنا .. إن لم طلع من صرخة الجعانين ..

إن لم بقى صوت العرق والطين

الشيالين .. هيه

والبنّايين .. هيه

والحدادين .. هيه

وعرق صنايعيه عايشين .. ومش عايشين .

كورس: دلوقت كل الغنا ع السكه بيهاتى .. والكل واخذ معاه الفن للواطى .

المغنى: عشان ما نعلا .. ونعلا .. ونعلا

لازم نطايطى .. نطايطى .. نطايطى (*)

كورس: لكن يا شيخ سيد .. مش كل خطوات النغم ضلمه .. اللحن

والكلمه .. كانت لهم أيام .. يوم كنا بنحارب .. يوم كنا
قايمين بنبنى .. كان للوطن فى كل قلب مكان .. يومها النغم
قام تانى يتكلم .. ومنك اتعلم .. كيف النغم يصبح
رصاص .. كيف النغم يقدر .. يفتح طريق الخلاص ..

المغنى: قوم يا مصرى مصر دايمًا بتناديك

خذ بنصرى ، نصرى دين واجب عليك

شفت أى بلاد يا مصرى فى الجمال

تيجى زى بلادك اللى ترابها مال

كورس: واديننا فى بلادنا

برغم غربتنا

بنقول يا شيخ سيد للدنيا كلمة حق ..

شيخ سيد: قولوا ولا تخافوا

واللى يشيل حملة على كتافه

يصبر ويتحمل ..

وبكره مصر العشق والثوره

ترجع لكم أجمل من الأول ..

قولوا ولا تخافوا .. دوسوا الكلام الهمس

وفكروا ف بكره

وخلوا ع الفكره

اللى جرى بالأمس

طول عمر جرحك يا أمى

دم الفقير يداويه

واللى شعاع الكلمه ما يدقيه .

صوت السلاح هوا اللى بيصحيه

كورس: حنقول يا شيخ سيد.. ونشيل على كتافنا.. ونقول لمن
شافنا.. إحنا بغناك عايشين.. وزى ما الثوره عاشت فى
حياتك نغم.. حنخلّى غنوتنا لمصر النشيد والعلم.. لحد ما
تعود مصر.. كما فجر بيشقشق.. كما شمس بتدقى..
ونعود لها سالمين.

المغنى: سالمه يا سلامه.. رحنا وجينا بالسلامه..

صفريا وابور واربط عندك

نزلنى فى البلد دى

بلا أمريكا

بلا أوروبا

ما فى شىء أحسن من بلدى

والمركب اللى بتجيب أحسن م اللى بتودى

يا أسطى بشندى (*)

الراوى: فينك يا شيخ سيد.. لا زال غناك ع البال.. ما زال غناك

موال لكل الشغالين.. أنغامه بتنقط عرق.. أنغامه بتخلّى

الحروف تنطق على سطور الورق.. يوم ان حضن عودك ثوره

١٩.. طلع النغم م العود كما البركان.. بيقول لكل الناس

ما فيش أوطان تعيش عاله.. والا تعيش ع الفتات.. نمد

إيدنا نسأل الخواجات.. نسأل ما تدينا.. لسه غناك بيقول

لكل الناس.. العزه فى اللى بتصنعه ايدينا.

المغنى: مليحه جوى القلل القناوى
رخصه جوى القلل القناوى
جرب حدانا وخذ قلتين

خساره قرشك وحياء ولادك
ع اللى ما هوشى من طين بلادك
قوللى .. حتلقى زى دى فين

الدنيا ما لها يا زعبلوى .. شقلبوا حالها وين المداوى
شرفوا البلاوى .. دا البنك ناوى .. يرفع دعاوى عشان
يتاوى

فلوسنا واحنا متقندين(*)

الراوى: وما كانش .. بالصدفه .. تتمد أحلامك .. تحضن إيدين
العرقانين .. تحضن بأنغامك .. صوت المكن والآلات .. ما كانش
لسه اتولد حلم الصنایعيه .. فى الآله والمصنع .. أيامها كانوا
الفلاحين لسه عبید الأرض .. وابن البلد فى المدينه سيد
الحرفه .. أيامها كل اللى غنى .. غنى للبشاوات .. وكنت
وحدك بس صوت الاسطوانات .. لكل طايفه لغه .. ولكل حرفه
نغم .. ما نسيتش تحلم حتى حلم الشیالين ..

المغنى: شد الحزام على وسطك غيره ما يفيدك
لا بد عن يوم برضه ويعدلها سيدك
وان كان شيل الحمول على ضهرك يكيدك

أهون عليك يا حر من مَدَّة إيدك (*)
الراوي: طول ما انت عايش فى حياة البشر

نغم وثوره وفجر
م المستحيل مصرك يصيبها شر
لسه غناك ع المدنه بيكبر
لسه غناك فى مصر .. نهر النيل
لسه غناك فى بندق العسكر
فى دم كل شهيد
لسه غناك عايش فى ثورة شعب
دلوقت بس
وأنا باقلب فى تاريخ فنك
ما عدت يوم احتار
وعرفت ليه الأجنى السمسار .. كان عينه دايماً عليك .. ما
كانش همه بس ينفى سعد .. ويشرد الخاليق .. كان همه
يشنق فى القلوب أغانيك .. غناك يا شيخ سيد .. ما كانش
كلمه ونغم .. كان بندقه وطلقه ضد المعتدى .

المغنى: تلوم عليه إزاي يا سيدنا
وخير بلدنا ما هش فى إيدنا
قوللى عن أشياء تفيدنا
وبعدها ابقى لوم عليه (*)

(*) من أغاني فنان الشعب سيد درويش .

ليست النهاية


يا أول المشوار وصلنا
لآخر المشوار وصلنا
خد من حكايتنا
شموع فى سكتنا
وف خطوة النهايه
حبتدى الحكايه
حكايتك يا بهيه
للأيام اللى رايحه
والأيام اللى جايه

يا مصر ... يا بهيه .

شركة الأمل للطباعة والنشر
(مورافيتلى سابقاً)
ت: 23904096 - 23952496

صوتك رفعته ع المساجد صليب
صوتك رفعته ع الكنائس هلال
قلت لولادنا.. وكل أهل بلدنا
جرس الكنيسة.. يبقى جنب المدنه
يحضن صداه فى السما صوت بلال
قلت العدو لو حط رجله فى بيتنا
يلعب على حبل الخداع والفتنه
ويخلى نور الحق يبقى ضلال
صوتك رفعته ع المساجد صليب
صوتك رفعته ع الكنائس هلال

Bibliotheca Alexandrina



0940630

ضمن مطبوعات مؤتم

الدورة

25

2010



www.gocp.gov.eg

www.qatrelnada.com.eg

www.althaqafahalgadidah.com.eg

www.odabaaelaqaleem.com

التمن : ثلاثة جنيها